



Pisortat ataatsimoortumik allaffissornerisa aaqqissugaanerannut atatillugu naliliinissamut ataatsimiititaliarsuarmik pilersitsisoqarnissaanut Naalakkersuisut peqquneqarnissaannut Inatsisartut aalajangiiffigisassaattut siunnersuut. Maanna suliassaasut aallaavigalugit allaffissornerup annertussusaa ataatsimiititaliarsuup nalilersussavaa, suleriaatsit sunniuteqarluarnerusut pilersinnissaannut immikkoortortaqaarfiillu suliassaqaarfiillu (sektorit) akimorlugit suleqatigiinnerup pitsanngorsaaviginissaanut periarfissat misissussallugit, kiisalu allatut aaqqissuussinissamut periarfissanik siunnersuuteqarluni. Siunnersuutini tamani inatsisit ingerlatsinermut tunngasut qasukkartinneqannginnissaat aallaaviussaaq. Ataatsimiititaliarsuaq inunnit sektorinit assigiinngitsuneersunit inuttaqassaaq, tassa pisortat sektoriineersut aamma namminersortut sektoriineersut ilaasortat misilittagaqartut amerlaqatigiissallutik. Ataatsimiititaliarsuaq assigiinngissitaartuneersunit ilaliussanik sulisitaqassaaq, sulininilu ukiut marluk iluanni naammassissallugu. Tamatuma kingorna ataatsimiititaliarsuup innersuussutai Inatsisartuni politikikkut suliarineqassapput.

(Inatsisartunut ilaasortaq Peter Olsen, Inuit Ataqtigiiit)

(Siullermeerneqarnera)

Immikkoortuni Namminersorlutik Oqartussat kommunillu akuuffigisaanni marloqiusamik allaffissornerup pinngitsoortinneqarnissaanut, ataatsimut suleriaatsit pisariillisarniaannut isumalluutillu avitseqatigiissutigineqarnissaannut periarfissat qulaajaaffigalugit Naalakkersuisut nassuiaammik UKA2021-mut saqqummiussinissamik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Tillie Martinussen, Suleqatigiissitsisut)

(Siullermeerneqarnera)

Maanna siunnersuutit marluk imminut assigusut piffissami qaninnerusumi pisortat allaffissornerannut aningaasanik atuinerunissamik imaqartut sammissavagut. Inatsisartunut ilaasortap Peter Olsen ataatsimiititaliamik pilersitsisoqarnissaa kissaatigaa, Inatsisartunullu ilaasortaq Tillie Martinussen nassuiaammik saqqummiussisoqarnissaanik piumasaqarluni. Siunnersuuteqartut aamma isertuutinnigisaannik suliniutit tamarmik piffissami qaninnerusumi pinngitsooratik pisortat allaffissornerannut annertusaaqataassapput.

Siunnersuuteqartut piumasaat malillugit ataatsimiititaliap nassuiaatillu pisortat allaffissornerat misissussuaat, kingornalu periarfissanik siunnersuutinillu qanoq iliornikkut allaffissornerup eqaannerulersinnaanersoq, qanorlu marloqiusamik allaffissornerup pinngitsoortinneqarnissaanut saqqummiussissallutik.



Demokraatit siunnersuutit nangaanartortaqartippai. Siullermik ernumassutigaarput pisortat allaffissorneranni sipaarutaasinnaasunik eqaallisaarinernillu massakkorpiaq aallarnisarsinnaasaraluatsinnut siunnersuutit asuli kinguarsaataaginnassasut.

Aappaattut siunnersuutit tamarmik oqareernittuut anguniagatta killormuuanik piffissami qaninnermi pisortat allaffissornerannut aningaasartuutaaginnassapput.

Pingajuattut Demokraatit ataatsimiititaliamik nassuiaammillu pisariaqartitsinngillat paasiniarlugu inuiaqatigiinni annertuallaamik allaffissornersugut. Apeqquserneqarsinnaanngilarmi allaffissorneq angivallaarmat.

Taamaamat partiit unammilligassamut iliuuseqareerpugut, siorna aningaasaqarnermut inatsisissamut pisortat allaffissorneranut annikillisisumik isumaqatigiissuteqaqataagatta, taamaalillutalu aamma ukioq manna pisortat allaffissorneranut sipaarniarqoqassamat aningaasanut inatsisissatut isumaqatigiinninniarnissarput aqqutigalugu sipaaruteqartoqarnissaa naatsorsuutigaarput.

Naalakkersuisut 2020-mut aningaasanut inatsisissatut siunnersuummi atuarneqarsinnaavoq Naalakkersuisut 2020-mut missingusiornermini naatsorsuutigigaat 2020-mi 37,5 millioner koruuninik sipaaruteqartoqassamat, aammalu ukiuni tulluuttuni missingersuusiorfiusuni sipaaruteqarfiussasut. Demokraatit isumaqarput sipaaruteqarniarnermi angusaqarluarniarsarinerusariaqartugut, taamaalilluta aningaasat akileraarutitigut oqilisaanneqarnermut, atugarissaarnermut pitsanngorsaanerut imaluunniit suliassaqarfinnik naalagaaffimmiik angerlaassinermut atorsinnaangaluarpagut, taamaalillutalu politikikkut namminersornerunissarput siuarsarlugu.

Tassunga aaliagiinissatsinnut ataatsimiititaliamik nassuiaammillu ikiorneqarnissarput pisariaqartinngilarput.

Taamatut oqaaseqarluta siunnersuutit itigartinneqarnissaat innersussutigivarput.